

四庫全書

史部

欽定四庫全書

史部

江西通志卷六十九

詳校官監察御史

臣左周

檢討

臣

德生覆勘

總校官知縣

臣

楊懋珩

校對官典簿

臣

劉景岳

謄錄監生

臣

陳

賓

欽定四庫全書

江西通志卷六十九

人物

南昌府

四

明

曾鈞字廷和進賢人嘉靖進士授行人擢南京禮科給事中時四方銀場得不償費且為盜窟鈞奏罷之鈞剛廉疾俗首劾罷參贊尚書劉龍已劾翊國公郭勛

禮部尚書嚴嵩未幾劾工部侍郎蔣淦延綏巡撫趙錦最後劾罷操江都御史柴經直聲震一時出為雲南副使兩司詣黔國公率廷謁鈞始正其禮且釐還所侵麗江民地遷四川參政黔寇亂撫定之屢遷河南左布政使以右副都御史總理河道徐邳等十七州縣連被水患帝憂之趣上方略鈞請濬劉伶臺至赤晏廟八十里築草灣老黃河口增高家堰長堤繕新莊等舊牘閱數月工成進工部右侍郎治河四

年改南京刑部右侍郎久之乞歸家居十餘年卒贈

刑部尚書謚恭肅

白志

按曾鈞事安志府志俱失載白志補入所著有前

溪集

李逢字邦吉豐城人獄之曾孫遂之兄嘉靖進士授紹興府推官有廉明譽擢兵科給事中大同叛卒據城逆命言者以用兵激變歸罪總督劉源清下獄逢上疏申救源清乃得免轉戶科有旨幸承天偕同列伏

闕諫逮繫謫永福典史稍遷歷知德安府為政以正  
綱紀重教化為先黷吏黥民持法不少假禔身清肅  
境內凜然卒祀名宦

人物志

李遂字邦良豐城人嘉靖進士授行人歷刑部郎中錦  
衣衛送盜十三人遂辨釋其餘抵一人罪調禮部忤  
宰臣夏言因事劾之下詔獄謫湖州同知遷衢州知  
府擢蘇松兵備副使遷廣東按察使進山東右布政  
使江洋多盜以右僉都御史提督操江倭擾江北廷

議請特設巡撫遂以故官撫鳳陽四府時淮陽四府倭寇歲復大水遂請餉增兵恤民節用次第畫戰守計明年四月倭數百艘寇海門遂語諸將曰賊趨如皋其衆必合合則侵犯之路有三由泰州逼天長鳳泗陵寢驚矣由黃橋逼瓜儀以搖南都運道梗矣若從富安沿海東至廟灣則絕地也乃命副使劉景韶遊擊邱陞扼如皋而身馳泰州當其衝賊知如皋有備將犯泰州遂急檄景韶陞遏賊連戰丁堰海安通

州皆捷賊沿海東掠遂喜曰賊無能為矣令景韶陞  
尾之而致賊於廟灣賊據險不出攻之月餘不克遂  
令景韶塞塹夸木壓壘陳火焚其舟賊乘夜雨潛遁  
江北倭悉平璽書獎勵賊駐崇明三沙者將犯陽州  
景韶戰連勝圍之劉莊會副總邱顯來援遂檄諸軍  
盡屬顯攻破其巢追奔白駒場時遂已遷南京兵部  
侍郎甫數月振武營軍變振武營者尚書張鰲募  
健兒以禦倭者也素驕悍以給餉踰期鼓譟圍督儲



侍郎黃懋官署許犒十萬金乃稍定遂乃託病閉閣  
給免死券以安之而密諭營將掩捕首惡二十五人  
繫獄止誅叛卒三人餘戍邊衛未幾擢南京參贊尚  
書事奏調鎮武軍護陵寢一日散千人留都自是無  
患越四年以老致仕卒贈太子太保謚襄敏

白志

按尹洞山集所撰李遂墓志與此所紀小有異同  
又羅念菴集載遂之父名萬平字惟衡以諸生終  
老所著有饑約穴游桑榆諸豪今不傳

劉良弼字賚卿南昌人嘉靖進士授金壇知縣擢御史  
正色敢言不少阿附時巨璫馮保弄政首疏參劾謂  
其罪浮於劉瑾未幾而保敗巡按八閩畿輔凡所建  
白不屑細瑣上防邊六漸略數十萬言皆長算用忤  
相淹卿寺久之乃遷巡撫西粵尋卒

人物志

萬虞愷字懋卿南昌人嘉靖進士授無錫知縣治尚寬  
大擢南京兵科給事中數與守備內臣露章爭事謂  
營兵不當充私役又謂操江都御史故常與守備參

贊列坐而後為權璫所抑設次西向非是及奏革宣  
成以來冒功陞襲者若干人歷山西左布政使累晉  
南京都察院右副都御史總督漕儲除京商和買之  
困又上便宜六事軍民頌德立碑於中和橋以刑部  
右侍郎致仕

豫章書

按萬所著有楓潭詩鈔

魏良弼字師說新建人嘉靖進士授松陽知縣召拜刑  
科給事中張璫桂萼初罷相詔察其黨給事中劉世

揚等議及良弼以吏部言得留尋命巡視京營劾罷提督五軍營保定侯梁永福太僕卿曾直罪武定侯郭勛家奴論團營兵政之弊直聲大著會南京御史馬弼等以劾吏部尚書王瓊被逮良弼請釋之帝怒并下詔獄論贖還職三遷至禮科都給事中十一年八月彗星見東井芒長丈餘良弼引占書言彗星晨見東方君臣爭明彗孛出井姦臣在側大學士張孚敬專橫竊威福致妖星示異亟宜罷黜孚敬奏良弼

挾私帝已疑孚敬兩疏皆報聞給事中秦鰲疏再入  
孚敬罷去踰月良弼復偕同官劾吏部尚書汪鉉帝  
方向鉉奪良弼俸鉉孚敬俱恨良弼明年元日副都  
御史王應鵬坐事下詔獄良弼言履端之始不宜以  
微過繫大臣帝怒再下詔獄獄卒訝曰公又來耶為  
垂涕尋復職奪俸時孚敬復起柄政與鉉修前卻以  
考察後命科道官互糾又奏上十一人不及良弼孚  
敬益怒擬旨切責令吏部再考鉉別糾二十六人而

良弼及秦鰲葉洪皆前劾孚敬鉉者中外大駭良弼  
竟坐不謹削籍隆慶初詔起廢籍以年老即家拜太  
常少卿致仕卒天啓初追謚忠簡所著有水洲集

白志

辜用琥字子西南昌人嘉靖鄉舉知廣西府攜一僕自

隨清慎恬淡草土司常例省里甲夫馬靖盜息民豪

猾歛跡莅政四載民無欺罔以終養乞歸

雲南通志

魏良政字師伊新建人王守仁撫江西與兄良弼弟良  
器良貴咸學焉提學副使邵銳巡按御史唐龍持論

與守仁異戒諸生毋往謁諸生多畏避而良政兄弟  
獨不顧深為守仁所許良政功尤專孝友惇朴燕居  
無情容嘗曰不尤人何人不可處不累事何事不可  
為舉鄉試第一而卒良弼嘗言吾夢見師伊輒汗浹  
背良貴官右副都御史守仁之學傳江西者多實踐  
自鄒守益歐陽德外皆以學行重云

白志

魏良器字師顏號藥湖洪都從學之後隨陽明至越時  
王龍溪畿為諸生落魄不羈每見往來講學者竊罵

之居與陽明鄰不見也良器多方誘之一日與同門  
友投壺雅歌龍溪過而見之曰腐儒亦為是耶良器  
答曰吾等為學未嘗擔板汝自不知耳龍溪於是稍  
相暱就己而有味乎其言遂北面陽明錢緒山臨事  
多滯則戒之曰心何不灑脫龍溪工夫懶散則戒之  
曰心何不嚴慄其不為姑息如此歸主白鹿洞生徒  
數百人皆知宗王門之學卒年四十二

明儒  
學案

萬廷言以忠號思默南昌人虞愷子受業於陽明登進



士第歷禮部郎中出為提學僉事罷官歸杜門三十餘年匿跡韜光研幾極深念庵之學得廷言而傳尤深於易三百八十四爻無非心體之流得不著爻象而又不離爻象自來說易者程傳而外未之或先也

同上

按人物志稱思默平生著述多所發明有學易齋前後集易原易說經世輯要共若干卷其書皆失傳惟約語中多格言觀學案中所摘數十條生平

得力可知

原跋

阮文中字用和南昌人嘉靖進士累官貴州巡撫時土官安國亨安智相訐殺前撫將坐以叛逆未決文中至訪得實平其事免軍興之擾巨寇者念擁兵僭號垂三十年有司不能制因不以聞文中請於朝發師討平之遷湖廣巡撫

貴州名宦志

鄧鏞豐城人家貧嗜學手不釋卷精於易中嘉靖鄉舉官教諭造士多成就知漢陽縣吏事精敏處置山陽

荒賦裁減冗費民免於累凡所施設綽有成績

湖廣名宦

志

傅習進賢人由進士任大理評事以執法忤劉瑾謫理問怒猶未釋復逮詔獄後歷官副使屢建軍功終副

都御史克定土官之亂

分省人物考

李璣字邦在豐城人嘉靖乙未舉南宮廷試二甲第一改庶吉士授編修陞左中允署國子司業纂修會典成晉諭德歷祭酒轉吏部侍郎兼學士掌詹事府已

未曾試主考尋拜南京禮部尚書致仕平生樂易洞

達不設崖岸人皆庇其德字焉有西野集

人物志

熊汝達字德明進賢人嘉靖進士除刑部主事歷泉州

知府歲己未倭逼泉州悉力捍禦與士卒為伍夜分

披甲不釋相持月餘寇去泉人德之為立生祠遷四

川副使歷廣東左布政擢右副都御史巡撫廣東改

浙江轉工部右侍郎清約無改素風尋乞歸養時年

已望六孺慕夔封君色稍不和則長跼請不命之起

不敢起析宦橐以遺二弟又數年起刑部左侍郎尋遷右都御史掌南京都察院甫任復以事被劾歸所著有讀書劄記知驚錄穀堂或問弋蟲集觀物豪同上

余禎字興邦奉新人正德進士授工部主事改武庫司

嘉靖甲申議大禮禎與羣臣伏哭左順門下詔獄朴於闕廷時死杖下者十七人禎其一也隆慶改元贈

光祿少卿

白志

吳金字礪伯豐城舉人嘉靖間知建寧潮汀賊蚤起練

鄉兵固守禦每戰斬獲奪回所擄男婦甚衆

福建通志

魏時亮字工甫南昌人嘉靖進士授中書舍人選兵科給事中隆慶中副檢討許國使朝鮮故事王北面聽詔使者西面時亮爭之乃南面宣詔還進戶科給事中十月初詔停日講時亮率同列言天未沴寒不宜遽輟俄請以薛瑄陳獻章王守仁從祀文廟章下所司三年擢太僕少卿初徐階高拱相講時亮與朝臣攻去拱已而拱復入考察言官排異已者時亮及陳

璚張櫝已擢京卿皆被斥時亮坐不謹落職萬厯十二年用薦起南京大理丞再遷太僕卿副都御史攝京營戎政歷刑部左右侍郎南京刑部尚書踰年卒官時亮初好交游負意氣嘗劾左都御史張永明為時論所非時亮亦悔之中遭挫抑潛心性理之學天

啓中謚莊靖

白志

按時亮晚年好會友講學輯周濂溪而下至王文成九先生語編曰大儒學粹與其奏議並行於時

跋原

雷禮字必進豐城人嘉靖進士授興化司理所讞獄多  
奇中民頌之如神明尋晉吏部主事歷考功郎中坐  
持法失貴臣意謫大名府通判累陞浙江提學副使  
擢南京太僕少卿歷工部左侍郎午門樓工成加尚  
書督建三殿尋常部事晉太子太保至少傅隆慶初  
太監滕祥傳造器物禮抗章劾祥并乞骸骨內批准  
致仕歸卒贈太保禮嗜學明習朝典有大政記內閣



行述列卿年表諸書行世

豫章書

按雷所著尚有鐔墟堂稿二十卷

楊薰字太和南昌人正德進士授主事謫潮州通判耿介特立受俸薪猶恐自累遷知州去囊無銖積歷惠州府同知嘉靖中陞四川兵備僉事改貴州致仕家居曳履徒行絕無貴倨之色巡撫王守仁題清流臣

子贈之

人物志

丁以忠字從

一作崇

義新建人嘉靖進士授刑部主事錦

衣衛捕劫盜四人奏下刑部以忠廉其贓僅有一油  
帝鈎得物主審所繇而釋之錦衣亦服歷郎中陞知  
河間府治最時熊尚書浹以直言得罪命官校督解  
以歸拳拮就道人畏莫敢近至河間以忠獨郊勞如  
常且謂詔使曰熊公重臣所坐非大譴向隅失上意  
耳何至是若不憂殺大臣耶即有禍福某當之詔使  
悟遂破械聽具輿從以行卒護持無恙陞山東按察  
副使累遷左布政使擢右副都御史巡撫山東下令

革冗卒裁其饗佐以贖餼之美大賑諸鄉落盜多解散歸命一意拊恤甚得齊魯間心轉南京兵部右侍郎未幾滿三品俸考績分宜相欲留之比謝弗應明年以入賀至亟疏致政所著有世美堂橐孫此呂有至行父歿割腴產以遺三庶弟舉進士授工部主事七歲不遷卒於京邸貧無以為殯人共惜之

豫章書

熊汝器字國用南昌人嘉靖進士授上虞令陞蘇州府同知母喪服闋補松江同知禦倭有功賜金帛條陳

備倭十事略見施行歷南禮部郎中湖州兗州二府陞陝西行太僕寺少卿山西行太僕寺正卿兼整飭

寧武兵備副使入覲乞休還里居四年卒

人物志

李遷字子安新建人嘉靖進士授南京兵部主事歷武選郎中魏國公奏孫寧侵孝陵壩地為市肆株引甚衆下部偕法司窮竟尚書屬遷會鞫得從減論出株引者數十百人出知濟南府陞湖廣按察副使歷左布政使擢右副都御史巡撫真定久之晉兵部右侍

卽兼僉都御史總督兩廣以廣東諸軍破倭斬鹵千計調狼土兵平廣西古田擒巨寇韋銀豹等置永寧州績聞陞南京刑部尚書致仕歸家居十餘歲卒隱無餘錙諸子鬻產為歛嘉隆間南州士大夫談清節者必推李尚書云詩文醇雅有致其傳者鶯谷山房

集

人物志

張鏊字濟甫南昌人嘉靖進士選庶吉士授禮部主事遷祠祭司卽中隆興寺火奉命同中人撤大善殿佛

像中人欲収其實幢珠玉以進鑒不可遂燬之出為  
浙提學副使轉遼東苑馬卿比去遼人為立生祠歷  
廣東左布政使陞南京太常大理卿繇刑部侍郎超  
拜尚書掌南兵部致仕歸家居十三年卒生平清苦  
終始一節布衣蔬食四壁蕭然諸子至不能自給

書

豫章

按濟甫所著有遷鶯館集

蔡國珍字汝聘奉新人嘉靖進士鄉人嚴嵩當國欲羅

致門下國珍不應乞就南為刑部主事就改吏部進  
郎中出為福建提學副使以侍養歸遭母喪服除遂  
不出家居垂二十年起廢籍以故官莅福建遷湖廣  
右參政歷浙江左布政使以右僉都御史提督操江  
召為左副都御史歷吏部左右侍郎進吏部尚書三  
殿災率諸臣請修省倡廷臣詣文華門請舉皇長子  
冊立冠婚言必得請方退帝遣中宮諭曰此大典稍  
需時耳何相挾若是乃頓首出稱疾累疏乞休國珍

素以學行稱風力不及孫鑰陳有年而清操似之家

居十三年卒年八十四贈太子太保謚恭靖

白志

按蔡國珍人物志及安志俱失載

江治字舜卿進賢人十三補弟子員父玠以逋租逮治  
匍匐以解父厄孫忠烈公召而試之大奇異授以館  
廩比忠烈殉宸濠難奔入會城縞素伏棺哭盡哀王  
陽明召見器之語以學愈自奮舉嘉靖進士任刑部  
主事陞廣東按察僉事督學政得士為多擢南京尚



寶司卿遷太常少卿署應天府歷卿光祿太常拜南京工部右侍郎致仕歸顏其亭曰洗心田居騎一蹇驢挾小蒼頭與村父相慰勞值歲饑嗷嗷自給意泊如也奉詔存問年九十二臨終戒諸子無以祭葬累

縣官

豫章書

江滙字東之進賢人嘉靖進士授兵部主事歷陞湖廣按察副使浙江按察使持法峻整有豪民坐殺人行千金求鬻獄拒之又屬柄相以請不聽竟論死轉河

南右布政使以前事中辭訖歸家居田宅無畝有遊

楚橐

同上

李東華字景曉豐城人嘉靖進士授太常博士選工科給事中歷吏兵科嘗上疏言精考課四事又疏言釐時弊五事進禮科都給事中卒貧不能喪里官賻之

始克殮

林志

齊譽字文實南昌人嘉靖進士以給事謫知永嘉律已

廉正究悉民瘼編派里遞班次至今便之

浙江通志

張臬字正野進賢人嘉靖進士授刑部主事以事謫靈川縣丞稍遷寧國同知歷閩蜀秦楚藩臬拜右副都御史巡撫四川值五酋稱王自雄長謀陷叙州臬檄所部兵討之賊擁長矛披涇絮列巨牛為陳臬令揭竹為竿悉長二丈造無聲礮五百火箭千束飛擊之無不立斃者賊盡奔木頭寨臬又置樓櫓火箭焚其草舍改奔石城寨世所稱鴉飛不到山也山博十餘里四隅壁立鳥道亡先登者臬曰此可計而取之也

密令謀者誘一首阿黑官至則勞以酒食綵帛鼓吹  
旗蓋遨遊寨之麓以誘之賊相顧錯愕乃下令盜中  
能捕首目一人者得弗死有武生劉顯者南昌人能  
以一當百署為先鋒獲其土官安得祿盜衆悉降首  
惡阿焦林匿山後洞穴中十日不得梟時已拜南司  
寇佯言當縱小醜班師賊果怠擒之入留都適倭寇  
張甚或傳將圍通州犯瓜潤留都大恐梟曰此綴兵  
法耳禍其在揚州乎已而果然初劉顯累建奇績梟

言之大司馬張鰲檄為南京水軍守備未幾以副總  
兵滅倭賊於長江識者推其將將之功焉擢兵部右  
侍郎提督廣西軍務大盜張璉稱號僭亂流毒三省  
梟同平江伯陳王謨討平之捷聞進都察院右都御  
史俄命總督閩廣軍務為言者所中歸老鍾陵人物志  
萬敏字欽夫南昌人嘉靖進士知太倉州崇明有大慝  
王秦沈三人利私讎而倡擷海上敏單舸詣縣召沈  
至榻前款諭之且泣且受命王秦負險弗順將謀不

利於敏亟浮海入州城會上命湯帥勦諸海寇敏午  
治樓櫓至夕三百艘畢具戰卒凡三千人牛酒之犒  
吐嗟而辦將士咸大悅會戰湯帥以巨艦六十乘風  
而進敏殿之瞬息達崇明捕斬無算敏慮其妄殺也  
矯中丞令大呼曰生擒者賞首級者弗論師中擒二  
千人械送至訊釋平民千八百餘人得劇盜百七十  
人置之法歷襄陽同知遷貴州僉事備兵畢節居三  
年御史疏其才陟貴藩少參致仕

同上

齊柯字文則南昌人嘉靖鄉舉署和州學正修州乘分校河南鄉試遷瑞安知縣邑苦田賦不均柯至首建度田之議請於臺司若郡每都擇公正一人董其事己自裹糧屨畝握算而紀其籍民有訟者即於田間片言取平傍邑民間之爭請受筴當道檄令度平陽田旬月亦報竣無何奉例丈量二邑抱成筴以應皆柯力也徵入補大理評事擢臨安知府過里謂人曰度兩歲俸足償逋金吾將老焉其治郡以德化民如

令瑞安狀小疾投劾去

府志

王希烈字子忠南昌人嘉靖進士改庶吉士授編修累官國子祭酒禮部侍郎改吏部兼侍講學士掌詹事府充經筵日講嘗攝宗伯事肅府中尉某陰規為嗣正色絕之萬厯甲戌典會試江陵子落第人服其不

私卒贈禮部尚書謚文裕

人物志

余曰德初名應舉字德甫南昌人嘉靖進士授刑部主事歷福建按察副使在刑部時與李攀龍王世貞輩



相倡和歸田後詩道益振尤善五七言近體有午渠  
集德甫詩集同邑按察副使喻邦相均時亦以文名  
著山居橐曰德有曾孫正宗禎已已恩貢博雅能文

著寒芳閣文橐昔邪園詩集行世

同上

黃國華字良寶豐城人嘉靖進士守龍安時郡新設賦  
繁重國華惟務節省以寬民力裁革殆盡萬歷初入  
覲卒於京卒之前一日猶議陳地方利病其盡心民

事如此計聞士民祠祀之

四川通志

陳棟字隆之南昌人嘉靖乙丑會元廷試及第授編修  
隆慶間擢右贊善侍班東宮適見楮畫墨汙正色而  
諫東宮為霽容更書時謂有公權筆諫之風辛未校  
士拔同郡鄧以譏第一後為名臣世稱其鑑識未幾

卒

府志

何祉字德徵進賢人嘉靖進士授行人擢戶科給事中  
西北諸省大饑奏請發內帑免徵輸以甦民困以母  
老乞便養改南京兵科條軍政四事馬政五事著為

令申與同臺會糾王太宰瓊以此見忌出為嘉興知府性方嚴不假人以嘖笑戢暴綏良修教勸學期月

郡中大治坐蜚語罷民為立祠

分省人物考

朱憲章字良範進賢人嘉靖進士授行人擢兵科轉戶科時方造龍舟費至鉅萬憲章疏凡兩上遂停出為四川副使歷福建參政告歸與羅洪光唐順之往還論學晚更好易推本爻繫之旨多所發明著訂頑隨

筆雲里子集

人物志

萬恭字肅卿南昌人嘉靖進士授南京文選主事歷郎中就遷光祿少卿入改大理寇逼通州帝方急兵事以兵部右侍郎蔡汝楠協理戎政命恭代汝楠恭列上選兵議將諸事皆報可明年請劇邊有効命兼僉都御史巡撫山西甫至寇犯龍鬚墩伏兵擊却之未幾寇五萬騎至朔州川恭與戰老高墓寇去事聞賚銀幣巡撫故無旗牌恭請得之濱河州縣患套寇東掠歲鑿冰以防恭為築牆四十里教人以耕及用水

車法民大利之以內艱歸隆慶六年河決邳州運道  
大阻命恭以故官總理河道築長堤北自磨臍溝迄  
邳州直河南自離林迄宿遷小河口袤延三百七十  
里費帑金三萬六十日而成高寶諸湖夏秋汜濫歲  
議增堤而水益漲恭緣堤建平水閘二十餘以時洩  
蓄專令濬湖不復增堤河遂無患恭彊毅敏達一時  
稱才臣治水三年言者劾其不職罷歸家居垂二十  
年卒孫燦有傳

白志

熊廷用豐城人嘉靖間為長樂典史時倭寇猖獗逼縣城廷用登陴守禦開門令老幼俱入城存活數千人

修築濱湖民受其利

福建通志

吳桂芳字子實新建人嘉靖進士授刑部主事有崔鑑者年十三忿父妾凌母手刃之桂芳為著論擬赦尚書聞淵曰此董仲舒春秋斷獄柳子厚復讎議也鑑遂得宥及淵入吏部欲任以言職會聞繼母病遽請歸起補禮部歷遷揚州知府禦倭有功又建議增築

外城揚有二城自桂芳始歷浙江布政使巡撫福建  
鄖陽進右副都御史總理河道未任兩廣總督張臬  
以非軍旅才被劾罷改桂芳兵部右侍郎提督兩廣  
軍務潮州舊倭屯據鄒塘桂芳先討倭以降賊伍端  
為前驅官軍繼進一日夜克三巢焚斬四百餘人與  
南贛提督吳百朋乘勝滅賊而新倭寇福建者為戚  
繼光所敗方流入境桂芳百朋會調土漢兵乘其初  
至急擊之倭懼悉奔甲子岬沙奪漁舟入海暴風起

皆覆溺死因建議海道副使轄東莞以西至瓊州領  
番禺市舶更設海防僉事巡東莞以東至惠潮專禦  
倭寇又進討亞元丹樓平之召為兵部右侍郎隆慶  
初以疾乞歸萬歷三年即家起故官總督漕運桂芳  
以淮揚洪潦奔流惟雲梯關一徑入海致海涌沙河  
流泛溢而興鹽高寶諸州縣所在受災請益開草灣  
及老黃河故道以廣入海之路修築高郵東西二堤  
以蓄湖水皆下所司議行未幾草灣河工告成而河



決曹縣徐州桃源其明年議塞崔鎮決口東水歸漕  
桂芳欲衝刷成河以為老黃河入海之道遂命兼理

河漕進工部尚書未踰月卒贈太子少保

白志

王臣字公弼南昌人為諸生時從王文成學嘉靖進士  
知泰州以所學施之政歲饑發倉大賑請蠲米六萬  
餘石作諭民錄申明聖訓或以天倫構訟者勸誨懇  
到多感泣如初撤毀神廟改建尊經閣立胡安定祠  
時王艮以布衣倡道安豐延至州學令諸生盡師之

一時里巷皆絃歌焉陞刑部員外轉浙江僉事為王  
文成撫孤不避嫌怨以廣東叅議罷歸學者稱瑤湖

先生

人物志

符鍾字伯聲新建人為諸生慨然慕聖賢之學以古禮  
為必可行丁內外艱俗用浮屠音樂悉屏絕之舉嘉  
靖鄉試卒業南雍從湛若水遊除知道州賑荒歉撫  
峒獍治行稱最卒於官所著有虛亭語錄

同上

朱多燿字用晦瑞昌王府奉國將軍善為詩與里人余

曰德相倡和因介李於麟王元美間數吟咏往還以此譽延海內有芙蓉園藁時建安輔國將軍拱樞亦以文雅知名著瑞鶴堂詩集爽臺藁各二卷

府志

涂紹燿字伯聚南昌人進士邃於理學督學四川公明並至士無遺珠自後名科甲皆出其簡拔著四書兒

訓士子賴之蜀中督學推第一人

四川名宦志

朱多燝字崇良瑞昌王府鎮國中尉父奉國將軍拱樞嘗以議禮稱旨賜勅諭有聲貴遊間燝博雅好詩始

與多燦齊名晚益精進評者謂其沉着闊達有先進

典刑云

府志

萬思謙字益父南昌人聞王伯安之學恍然有悟密探  
默契歐陽文莊一見賞歎以為聖門心印必屬斯人  
嘉靖進士知嘉定縣會倭患急乃城嘉定以備陞刑  
部主事改光祿寺丞秩滿謁吏部長揖而出坐奪一  
月俸出為四川叅議累遷福建左布政使藩司前有  
麗譙面五虎山門故從旁出思謙至闢正中門改山

名曰五福竟無害閩人壯之轉南京太常卿致書江陵相稱維世以禮容人以量願開言路自引咎語江陵相故同年生意不能無望故陽遜謝而言者伺其頤指露章引懸車例遂得致仕歸年甫六十一耳著大學迹古中庸述微平生粹行完操毫無愧怍所居環堵壁立歿後十六年始克葬

人物志

姜儆字君治南昌人嘉靖進士授宣城縣令陞浙江道監察御史初奉命巡視光祿條陳七事稱旨出視長

蘆鹽課繼巡按湖廣值歲侵民舍漂沒載道徹上流  
民圖多方賑救百姓乃得安業復巡視山東江浙閩  
廣所至聲望丕振擢翰林院侍講學士尋丁內艱起  
復冠帶閒居卒年七十五

淡溪姜氏事實

劉曰材字汝成南昌人嘉靖進士授韶州府推官峒人  
怨豪家收青殺七人尸於大澤雜始無驗曰材廉得  
其見知者鞠之辭窮獻狀囚亦皇遽伏竟獲七尸澤  
中獄上論報人驚以為神明遷刑部主事轉儀制司

遷湖廣按察副使改貴州督學復為山西參政守徐  
溝會石州之變寇騎迫太原督兵乘城一謀者袒而  
華言以入輒斬以殉衆心乃安寇亦竟出塞去歷陝  
西左布政使入覲歿於臨潼傳舍曰材性廉平自言  
三為刑言未嘗輕入人罪所至行李蕭然既歿而人

思之

白志

李材字孟誠豐城人遂子嘉靖進士授刑部主事由兵  
部郎中遷廣東僉事羅旁賊猖獗材襲破之周高山

設屯以守賊有三巢在新會境調副總兵梁守愚由恩平遊擊王瑞由德慶入身出肇慶中道夜半斬賊五百級毀廬舍千餘空其地募人田之亡何倭五千攻陷電白大掠而去材追破之石城設伏海口伺其遁而殲之奪還婦女三千餘錄功進副使萬歷初張居正柄國材遂引疾去居正卒起官山東以才調遼東開原尋遷雲南洱海參政備兵金騰金騰地接緬甸而孟養蠻莫兩土司介其間叛服不常緬部目曰



大曩長曰散奪者率數千人據其地材謂不收兩土  
司無以制緬遣人招兩土司來歸而間討抗命夷阿  
坡居頃之緬兵爭蠻莫材合兩土司兵敗緬衆殺大  
曩長逐散奪去緬帥莽應裏益兵至孟養復擊沉其  
舟斬其將一人乃退以雲南事被訐遂獲重譴幽繫  
五年論救者五十餘疏大學士申時行復為材申理  
皆不省亡何孟養使入貢具言緬人侵軼天朝救援  
破敵有狀聞與兵者在獄中皆流涕而楚雄士民聞

世祥等亦相率詣闕訟冤帝意乃稍解戍鎮海衛材  
所至輒聚徒講學繫獄時就問者不絕至戍所學徒  
益衆許孚遠方巡撫福建日相過從久之赦還卒年  
七十九材學雖受之守益以上接王守仁然不循其  
軌轍以大學知止知本為鵠標其宗旨曰止修學者  
稱見羅先生

同上

按見羅所著有學古知本圖說數學錄經正錄觀  
我堂豪共若干卷

葉修字克慎南昌人由進士任漢陽府司理性剛直不阿常面折人過藩臬皆憚之漢陽學廢賴以興復漢川賦為路藩奏割三之一民甚苦之修請以衡州有歲額解德安倉者移抵漢川民為祠祀焉

湖廣名宦志

姜博字克約南昌人嘉靖進士授溧陽縣令擢刑部主事累陞浙江僉事秉性剛直不阿附權貴解組歸居

家四十餘年卒年八十二祀鄉賢

淡溪姜氏事實

方孟縉武寧人早失父事母孝由進士授刑部主事時

貴戚張氏構大獄不決孟縉折斷平允理淮漕值江西吳城兌運軍民交變孟縉一詢輸服議改就省兌

至今民便之所著有鴈里殘橐

分省入  
物考

劉顯字草堂南昌人生而膂力絕倫稍通文義家貧落魄之叢祠欲自經神護之不死間行入蜀為童子師已冒籍為武生嘉靖三十四年宜賓苗亂巡撫張臬討之顯從軍陷陣諸軍繼進賊盡平顯由是知名南京振武營初設用兵部尚書張鏊薦署都指揮僉事

僉書浙江都司遷叅將分守蕪松倭犯江北逼泗州  
鏊檄顯防浦口顯測賊將遁追擊至安東方暑披單  
衣率四騎誘賊伏精甲岡下伺賊出潛毀其舟賊敗  
走舟舟已焚死者無算尋遷副總兵協守江浙振武  
營兵變後諸將務姑息兵益驕給事中魏元吉薦顯  
署都督僉事一軍怙然廣東賊起詔顯充總兵官鎮  
守其地廣東故無總兵官至是始以顯為之會福建  
倭患棘顯與叅將戚繼光連破賊賊略盡錄功進先

所廢世職二秩隆慶改元移鎮貴州拓地四百餘里  
得諸葛銅鼓九十三銅鐵鍋各一鍋狀如鼎大可函  
牛刻畫有文彩相傳諸葛亮以鼓鎮蠻鼓失則蠻運  
終矣錄功進顯都督同知已而勦餘孽復俘斬千一  
百有奇都掌蠻既滅顯引疾求去而以有司阻撓為  
言詔聽顯節制顯益行其志擊西川番沒舌丟骨人  
荒諸砦斬其首惡撫餘衆而還建昌傀儡洗馬諸番  
咸獻首惡西陲以寧九年冬卒官

白志

宋國華字崇樂奉新人嘉靖進士授休寧知縣貴溪張  
真人奉命有事於齊雲責供具苛甚國華詞其陰事  
欲發之張恐遜謝而去陞兵部主事歷職方郎中擢  
四川提學副使敷教以寬憐才若不及累遷雲南左  
布政使發黔國侵奪事逮其左右戍邊者三人轉應  
天府尹抵家病卒

人物志

劉廷梅字與和南昌人天性孝謹父客死維陽廷梅迎  
喪以歸涉江風惡幾覆舟抱棺而慟呼天請與俱溺

尋濟嘉靖進士知歙縣縣沿事供張令君甚設盡  
靡出之政令清簡訟庭幾闕無人比奉徵書敝衣羸  
馬以行除南京兵部主事歷知漢陽府擢廣東副使

致仕

府志

袁貞吉字孔安南昌人嘉靖進士授刑部主事遷南禮  
部郎中出知松江府吳淞江久塞侵濱河田出所節  
嗇金錢濬之竣役而民無擾高新鄭釋憾於故相徐  
迎合者上下其手郡中告密成風顧獨意無所附量



徙陝西行太僕少卿萬歷初改河南提學副使精品  
藻寬條約詳訓迪得人士心歷浙江左布政使擢右  
副都御史巡撫河南比歲薦饑請發帑金五萬兩米  
九萬餘石分部周賑召拜工部侍郎左都御史河南  
人為立生祠卒贈太子太保謚簡肅

豫章書

黃樞字翼卿南昌人嘉靖進士授嘉善知縣精嚴案牘  
發摘無遺尤留心里甲役法均平猾胥為之斂手邑  
大潦禾盡漂諸當道免冠頓首請括帑金以抵恒賦

陞南京工部主事歷武庫郎中遷知湖州府歲荒請蠲設賑不遺餘力卒於官廉介終身不易祀湖州名

宦

人物志

胡杰字子文豐城人嘉靖進士由庶吉士歷南祭酒陞

太常寺卿有劔西橐

明詩小序

雷夢麟字伯仁進賢人嘉靖進士授無為知州遷工部員外郎復除刑部明法律善持平駙馬鄔景和失撰青詞且辭賞忤旨坐劾屬夢麟論鄔不嫻文學罪在

辭賞薄治足矣獻上報可時震位未建有曾御史佩  
復命誤用青表上恕甚疑有譏訕下御史獄夢麟復  
佐尚書議當調外有旨切責已僅免御史官嘗奏進  
所著讀律瑣言又條上罪囚永戍者只以戍後生子  
代伍免行勾原籍議中格後竟行之遷天津兵備副  
使歷陝西左參政

府志

李棧字孟敬豐城人遂長子嘉靖進士授魏縣知縣魏  
俗健闘尚鬼棧申明教化酌定禮條使民誦習又令

無賽會無釀緡錢以粟易之計其羨為社倉而規其  
息頃之獄訟衰減鄉社困藏至八千餘調肥鄉塞邯  
鄲鄆米二口衝堤濬漳河故道灌田九里民祠祀焉  
拜監察御史萬歷初巡按湖廣還以臺中久次協理  
大察竟外遷浙江副使上疏致仕有困學纂言惜陰

橐及緝論語外編

人物志

方來崇字士功新建人與弟來獻同中嘉靖乙卯鄉試  
登丙辰進士授無為知州愛民潔已著有初政紀錄

考選刑部歷員外郎會方士詔獄執法忤旨挂冠歸  
林居四十載講學著書與王元美李於鱗暨德甫用  
晦諸公為詞林伯仲有元隱軒諸集行世

府志

喻南嶽字極夫新建人嘉靖進士授六安知州適倭寇  
起海上改調通州歷兵部員外郎中遷廬州知府新  
安富人挾重貲遊無為州州人某利其有拉殺之而  
匿其尸事已半載嶽一日坐堂上問左右曰階之下  
披髮短裳而水淋淋者誰耶左右無對嶽曰若有寬

第為若理即沐浴禱於城隍神明日呼左右一人來授以名居令往捕之一訊輒服合郡駭服晉四川副使備兵建昌建昌故在蜀西徼為瀘水所隔備兵使者憚不敢渡遙制雅州獨閬帥鎮其中多專恣喜事失蠻心歎叱馭趣渡瀘諸蠻望見車騎悉蒲伏迎道左嗣是閬帥凜凜自東不敢有所干犯諸蠻亦大喜尋以疾引歸番漢人扶轅泣送者數百里不絕

同上

李瑞芳字時禎豐城人嘉靖鄉舉授武義知縣多善政

以憂去縣人爲之立碑補永興縣值大荒仿周禮弛  
役緩征嗇神殺禮積粟之法民賴之復除知華客歷  
承天府通判引疾歸所在俱祀名宦

人物志

彭懋字汝德南昌人嘉靖鄉舉任順昌知縣庶事畢舉  
尤加意學校日進諸生親爲析義校課歷工部郎中  
廣東按察僉事歸無長物年至九十四載延平志名

宦

同上

鄧漢字潔之豐城人少孤貧殯父薄終身不忍華其衣

居母喪數日水漿不進嘗拾遺金坐待失者舉還之  
由歲貢任休寧常熟訓導遷金山衛教授作人以明  
倫敦行為先致仕歸年至九十

安志

熊登之新建人博學強記舉明經絕意仕進與同邑舒  
泰等闡明理學著有性理解聖學正宗行世事繼母  
徐至孝四方執贄者常數百人督學王宗沐極尊禮  
之未父而沒門人私謚貞孝先生泰好學有質行母  
歿哀毀廬墓事繼母如所生推產以讓其弟直指採



風以孝聞遽卒詔旌其閭

同上

葉香豐城人痛父早亡有感輒號慟不止母性嚴竭力承順必得其歡心婦稍拂於母即同跪寢門外怒猶未釋輒遣歸逾年母為娶妾受之竟不一御母問其繇泣曰顧婦尚未可絕耳母感其意即日迎歸新建魏良弼稱之曰孝行聞於朝野風表化諸鄉閭嘉靖

間旌

同上

袁坡字邦彛豐城人母死廬墓泣血三年與鄒謙之王

汝止諸先生講學遂棄制舉業結廬山中從過之士  
雲集平生不事產業晚歲家益薄讀書談道晏如也

同上

按鄧漢熊登之葉香袁坡前志皆不載今采入安  
志孝義傳尚有南昌章彤黃璉徐德明李溥錦新  
建崔琬鍾文奎鄭山鍾鎮豐城劉靜徐濤進賢支  
輔饒用文陳相靖安陳伯宣漆維縉黃廷輝羅汝  
德奉新熊金玉寧州陳龍武寧黃咍陳仲賢並陳

維晉胡輔不詳何縣人俱附錄姓名於此

劉建字懋中豐城人嘉靖鄉舉任汀州青州二府推官  
所至讞決多所平反閩倭亂後承檄巡行泉州便宜  
賑恤全活甚衆在山東殲顏神鎮劇盜均臨朐差役  
汀青兩郡俱立生祠致政歸

李輔字子卿進賢人嘉靖進士授中書舍人選監察御  
史萬歷初督學南直行部不攜胥吏弊蠹一清復刷  
卷京畿會江陵相遭父喪欲奪情言路伺指保留輔

獨不預歷山東巡撫工部尚書卒贈太子少保

人物志

唐堯臣字士良少事王文成講學有才名嘉靖鄉舉授湖州府通判遷桂林府首設方略擒土酋蕭公反赦而賚之令稽首受約於麾下衆莫敢犯陞杭州府同知擢浙江按察僉事備兵台嚴料理軍饗不絕倭至堯臣以戚繼光兵連破之增俸級一等尋歸著雨餘

閣筆二卷

府志

吳子金字維良南昌人為邑諸生從王文成學及文成

歸越子金與魏良政徒步往從之三年充然有得而  
歸嘉靖乙酉同良政登鄉舉時嚴嵩方掌北雍延之  
訓子未幾輒謝去竟不仕以講學終著壁箴屏銘夜  
氣說諸篇邑人陳源受學於子金後師安福劉邦采  
而友南城羅汝芳造詣益進

人物志

按唐堯臣吳子金明儒學案俱不載

鄧以讚字汝德新建人隆慶五年舉會試第一廷試第  
三授編修萬歷初座主張居正枋國政以讚時有匡

諫居正弗善也移疾歸久之補原官旋引退詔起中  
允至中途復以念母返再起南京祭酒就擢禮部右  
侍郎復轉吏部再疏請建儲且力斥三王並封之非  
言中宮鍾愛元子願早正春宮視臣民尤切陛下以  
厚中宮而緩冊立殆未諒中宮心况信者國之大寶  
建儲一事屢示更移將使詔令不信於天下非所以  
重宗廟安社稷也會廷臣多諫者事竟寢尋召為吏  
部右侍郎力辭不拜以讚登第二十餘年在官僅滿

一考居母憂不勝喪而卒贈禮部尚書謚文潔

白志

羅萬象字光大南昌人萬歷舉人令潛江會邑大侵饑民聚衆相奪勢不可止萬象取巨魁二人立斬之揭竿以示餘烏散復建北關以固圉創教場以習騎散徵糧之法立連環票善政不可勝舉

湖廣通志

徐作字季儒南昌人嘉靖進士初任刑部主事歷藩臬轉京堂至工部左侍郎掌本部尚書事考績歷長子懋勛其後復以奉勅提督黃河大工及督建乾清坤

寧兩宮大工晉都察院右都御史時爭冊立忤皇貴  
妃意冠帶閤住迨神宗晏駕光宗起擢工部尚書作  
即以是攀龍顛而逝熹宗登極其家人屢疏循例乞  
請五典奉旨下部議覆值魏黨擅權停閣崇禎十六  
年部議題補廕謚會闖賊犯闕事遂寢後祀鄉賢

志

鄧以誥字汝欽新建人嘉靖鄉舉年十九勵志學問與  
其弟文潔公以讚家庭切劘授建陽教諭鳩工遷學



費至數千金未嘗煩有司陞廣東博羅知縣邑恒煥  
民多病癩傳染誥下車適七里驛有山勢甚磅礴諸  
癩三百人羣聚其間男子擔負至者輒搶女子至輒  
執而淫之誥震怒曰癩本天刑不悔過又公然以強  
姦強盜犯大辟邪令諸遇癩者任持長槍刀直拒之  
癩見所懸示猶不為意以誥乃佯募壯夫約日驅縛  
三百人盡沉之江於是癩一夕遁去奏最遷刑部主  
事誥曰此王文成論學之署敢以聽斷而忘夙夜自

考乎是時有投匿名言鄭貴妃危太子事題曰續憂  
危弘議輔臣一貫誣少宗伯郭正域為之連及部郎  
於玉立禍不測誥密言於司寇曰妖書所坐無左證  
欲以莫須有殺天下士非法之平也言甚迫切竟得  
從末減擢衡州守郴大饑饑民萬餘人闌入礦山為  
盜格殺官兵鄒參知學柱議大舉進勦誥曰此愚民  
為救饑計非敢為亂也當一面持檄招安俟其解散  
徐賑之賊得檄果如約解散俄常寧又大饑黠徒誘

饑民數萬復入礦為盜參知欲以前所治郡盜策治  
之誥曰事安可膠柱饑民所以敢於複盜者度吾又  
必招安之也乃遣揮使率銳卒出其不意直趣至寧  
凡七閱月罪人斯得梟首惡三十輩餘黨悉散於是  
流亡麇集乃大發倉賑之寧境以平在衡三年報政  
遂上疏引疾致仕歸田垂數十年著衡州府志會心

編澹臺祠講章及遺藁一卷

同上

鄧子龍豐城人貌魁梧驍健絕倫兼通翰墨嘉靖中江

西賊起掠樟樹鎮子龍應有司辟破平之萬歷初從  
大帥張元勲討平巨盜遷銅鼓石守備尋擢署都指  
揮僉事掌浙江都司會麻陽苗金道侶等作亂擢參  
將討之賊解散其黨五開衛卒胡若盧等火監司行  
署靖州銅鼓龍里諸苗咸響應為亂子龍火其東門  
以致賊而潛兵入北門賊遂滅十一年閏二月緬甸  
犯雲南詔移子龍永昌木邦部耿馬有姦人罕虔與  
岳鳳同為逆子龍急戰攀枝樹下陣斬虔虔子招罕

招色奔三尖山自謂得天險令叔罕老率蒲人樂弩  
手五百阻要害子龍盡知賊間道乃命裨將鄧勇等  
提北勝菴渠諸番兵直搗賊巢夜半上而預伏兵山  
後夾擊火器競發生擒招罕招色罕老及其黨百三  
十餘人尖山巢空會劉綎亦俘兵鳳以獻進子龍副  
總兵永昌騰衝夙號樂土自兵罕倡亂始議募兵所  
募多亡命乃立騰衝姚安兩營劉綎將騰軍子龍將  
姚軍不相能致軍闕帝以兩將皆有功置不問既而

紆罷劉天俸代天俸被逮遂以子龍兼統之子龍右  
姚兵每工作輒虐騰兵及用師隴川子龍故抵昂兩  
營兵騰兵大不堪欲去副使姜忻令他將轄之乃定  
而姚兵久驕因索餉作亂由永昌大理抵會城所過  
剽掠諸兵夾擊之俘四百餘人亂始靖子龍坐褫官  
下吏十八年孟養賊思箇判子龍方對簿巡撫吳定  
請令立功自贖無何丁改十寨賊普應春霸生等作  
亂勢張甚定大徵漢上軍令子龍軍其右游擊楊威

軍其左大破之斬首一千二百級招降六千六百人  
帝為告謝郊廟宣捷受賀復子龍副總兵署金山參  
將事先是猛廣土官思仁烝其嫂甘線姑欲得之弗  
克偕其黨丙測叛歸緬數導入寇二十年攻孟養犯  
蠻莫土同知思紀奔等練山子龍擊敗之乃去子龍  
尋被劾罷歸二十七年朝鮮用師詔以故官領水軍  
從陳璘東征倭將渡海道璘遣子龍偕朝鮮統制使  
李舜臣督水軍千人駕三巨艦為前鋒邀之釜山南

海子龍素慷慨年踰七十意氣彌厲欲得首功急攜壯士二百人躍上朝鮮舟直前奮擊賊死傷無算忽他舟擲火器誤入子龍舟中火焚賊乘勢擊子龍戰死舜臣赴救亦死事聞贈都督僉事世廕一子廟

祀朝鮮

白志

涂杰字汝高新建人隆慶進士授龍游知縣擢廣西道御史請告起河南道陞光祿少卿萬歷癸巳值有三王並封之旨杰上疏語殊激切遂削職歸子紹燿已



未進士官廣西左布政使

人物志

張位字明成新建人隆慶進士改庶吉士授編修預修  
世宗實錄位以前代皆起居注而本朝獨無疏言史  
官充位無以自効宜日分數人入直凡詔旨起居朝  
端政務皆據見聞書之待內閣裁定為他年實錄之  
助張居正善其議奏行焉後以救吳中行趙用賢忤  
居正意謫徐州同知用薦擢南京尚寶丞俄召為左  
中允管司業事進祭酒疏陳六事多議行以禮部右

侍郎教習庶吉士引疾歸詔起故官協理詹事府辭  
不赴久之以申時行薦拜吏部左侍郎兼東閣大學  
士王錫爵還朝帝適降諭三王並封假待嫡為辭而  
位遽請帝篤修交泰早召高祿議者竊哂之錫爵去  
趙志臯為首輔位與志臯相厚善志臯以位精悍敢  
任政事多所裁決進禮部尚書改文淵閣以甘肅破  
賊叙功加太子太保復以延鎮功進少保吏部尚書  
改武英殿位初官翰林聲望甚重朝士冀其大用及

入政府素望漸衰主事丁應泰劾楊鎬喪師言位與鎬密書往來朋黨欺罔鎬拔擢由賄位得之帝恕下廷議遂奪職閒住除名為民位有才果於自用任氣好矜其敗也廷臣莫之救天啓中復官贈太保謚文

端著有閔雲館集叢桂山房稿

白志

張惲字士忠南昌人隆慶進士歷官廉介布衣蔬食與諸生無異繇福建布政仕至都御史巡撫貴州卒於任家居城南敞廬不蔽風雨

人物志

范謙字含虛豐城人隆慶戊辰進士歷官禮部尚書謚

文恪有雙栢堂集

府志

劉炆字瞻華南昌人萬歷舉人崇安教諭陞廣西永康  
令調繁藤縣以撫安猺獠功陞潯州府同知歷任多  
有實政篤志孝友年三十八以養母乞休著有說夢

集

廣西名宦志

李啓美字應成豐城人萬歷進士改庶吉士授檢討國  
儲未建會有三王並封之旨言者多獲譴責啓美上

書政府謂東宮原無待敵之條元子舊無分封之例  
豈惟失天下人心恐天地祖宗亦復悵然於此舉矣  
時論壯之是歲值萬壽聖節又上疏陳時政并獻四  
歲時爭傳誦比於前代陸敬輿著有李太史橐三卷

白  
志

李光祖字繩伯南昌人萬歷進士授溧陽知縣邑有圩  
塍為積滂所齧發帑金築之治賦第設鈛甬聽民自  
為委輸民不苦賦賦亦不逋行道人以暴疾仆於市

門無賴者借以誣市中人一訊立雪而官為殪死者  
遷南京吏部主事卒溧陽人請祀於名宦祠

府志

樊良樞字尚植進賢人萬歷進士令仁和與人推誠無  
隱徵比不事鞭扑水災議蠲賑悉心籌畫全活無算  
遷浙江提學以不作魏璫祠碑文解印綬歸著有易

解

浙江名宦志

羅憲凱字元甫豐城人萬歷進士令貴池清介絕倫人  
莫能干以私嘗捐俸修復齊山書院以勤勞卒官所

著有金陵北征入計諸草

府志

李瑄豐城人由進士擢御史遷福建僉事奉表入都列  
首輔申時行十罪語兼侵王錫爵削籍家居三十年

不復出

白志

按李瑄安志失載白志補

劉曰寧字雲嶠南昌人少博學多才志識弘達毅然以  
天下為任萬歷進士改庶吉士與陶望齡焦竑黃輝  
董其昌才名相先後授編修奉母假歸性至孝痛父

失養母時年七十餘入問寢興依依無異童子時復奉母入長安會纂修正史凡為公卿名臣傳紀三百三十有六陞右中允充東朝講讀官權採議起中貴四出海內騷動南康守吳寶秀忤湖口稅璫李道逮治詔獄曰寧發憤上書請撤礦稅諸使宥寶秀疏入留中曰寧遂奉母南歸尋起右諭德掌南京翰林院事由大司成晉少詹學士禮部侍郎改吏部卒予祭葬贈禮部尚書謚文簡

人物志



按劉曰寧所著有雲嶠集

丁此呂字右武新建人萬歷進士自漳州推官歷湖廣  
參政所至皆著政績權貴以計典修怨謫戍粵東尋  
以薦起天津海防贊畫未赴卒

丁氏世  
美集

吳銓文字行甫更名遇南昌人萬歷壬午鄉舉為漢陽  
推官有鄉猾以畝鬻富生蕭某紹生值而實無畝生  
往按宿地莊猾偵其僕舊私莊婦夜羣擊殺婦質明  
執生誣搆屬銓文訊狀文曰生嫗媼復怒殺媼邪論

報惟輕而後鞠者竟入生生償會御史慮獄生梏拳  
候鞠其僕直履赭衣懷刃詣直指前一手拔刃一手  
挾冤狀大號曰殺莊婦者我也語畢立自引決直指  
愕甚閱牘得銓文所著歎語遂直生而出之自是疑  
獄悉下銓文咸質神矢公以聽適楚宗以羸呂事構  
王而嫌趙中丞可懷為王所倚一日多宗白事復抵  
梧遂攘臂格中丞至死銓文時在黃聞變曰非撫莫  
靖廼夜馳省諭諸宗以朝廷優養德意會御史按安

陸銓文率諸李官往謁御史曰當以反聞衆嘿然銓  
文曰殺重臣誠不法幸猶未斬闕掠藏也脫不解毋  
廼驅使速叛邪御史用其言不月餘事定陞雲南安  
州知州題改興國州入覲卒

人物志

萬國欽字二愚新建人萬歷進士授婺源知縣徵拜御  
史言事慷慨不避權貴尚書董份大學士申時行王  
錫爵座主也屬浙江巡按御史奏請存問國欽言份  
諂事嚴嵩及削職歸吞噬鄉里無狀不宜加隆禮事

遂寢初吏部員外趙南星戶部主事姜士昌疏斥政  
府私人給事中李春開以出位糾南星士昌而其黨  
陳與郊為助刑部主事吳正志上疏言春開與郊媚  
政府干清議且論御史林祖述保留大臣之非於是  
御史赫瀛集諸御史於朝堂議合疏糾正志以臺體  
為辭國欽與周孔教獨不署名曰冠鷹冠服鷹服乃  
日以保留大臣傾善類為事我不能苟同瀛氣奪疏  
不果上火落赤諸部頻犯臨洮鞏昌帝召見時行等

於皇極門咨以方略時行以款貢足恃為言未幾警  
報狎至乃推鄭浴為經略行邊實用以主款議也國  
欽抗疏因列上時行納賄數事帝謂其淆亂國事誣  
汙大臣謫劍州判官吏部尚書陸先祖擬量移國欽  
為建寧推官帝以特賤不宜遷切責先祖而盡罷文  
選郎中王教等大學士趙志臯疏救亦蒙譙責國欽  
後歷南京刑部郎中卒

白志

按國欽字安志府志俱作和甫

黎道炤字明中南昌人萬歷進士知桐城縣擢諫垣歷  
禮科右給事中神宗時冊立未定大臣多阿匿陰陽  
上下相持不決道炤每疏即言他事必為連類摘發  
歲甲午有旨皇長子出閣講學預令採買金銖等物  
費三十餘萬而部臣疏請儀仗侍衛拜賀禮持不下  
且責言者道炤嘆曰此吾死諫日也即草疏約略千  
餘言一無避忌疏入上震怒株連臺省各降革有差  
道炤為民若而年冊立既定恩復冠帶厥後諸羽翼

者多名用至大官而道炤已不待光宗遺詔議卹始贈光祿寺少卿尋用子元寬仕晉階中憲大夫崇祀

鄉賢

人物志

章邦翰字公佐南昌人萬歷進士知潮陽縣拜監察御史巡鹽兩浙疏陳鹺政利弊伸枉獄絕請謁用例轉銜永僉事時議開銀礦政府致書屬察所屬有礦處歎曰言利豈人臣事君之義且擾民不復政府書五年不得調既防粵海簡練軍伍飭舟械謹扞擷設方

略多捕生倭及首功其闕出中土物悉籍之以佐軍需轉參政督儲山東陞雲南布政使未任請告歸卒

東粵人祀之名宦

同上

陳道亨字孟起新建人萬歷進士除刑部主事歷南京吏部郎中同里鄧以讚表貞吉亦官南都人號江右三清遭母喪家燬於火僦屋以居窮冬無帟妻子拾遺薪爇以禦寒或有贈遺拒弗受由湖廣參政遷山東按察使右布政使轉福建為左所至不私一錢以



右副都御史提督操江光宗立進工部右侍郎總理河道妖賊徐鴻儒作亂道亨守濟寧扼諸要害以衛漕舟事平增俸尋拜南京兵部尚書參贊機務楊漣等羣擊魏忠賢被譴責道亨憤偕九卿上言高皇帝定令內臣止供埽除不得典兵預政陛下徒念忠賢微勞舉魁柄授之恣所欲為舉朝中諫皆不納何重視宦豎輕天下士大夫至此疏入不納道亨遂求去歸踰年卒道亨貞亮有守自參政至尚書不以家累

自隨一蒼頭執爨而已崇禎初贈太子少保謚清襄

志白

饒景暉字廷奎進賢人萬歷戊子與二兄景暘五弟景  
暉同舉時謂三饒而景暉以連第筮仕部曹出守順  
慶轉福建提學副使考滿有聲復以參政視學科歲  
試凡再周蓋異數是時公四弟景曜督學兩浙同日  
命下朝野榮之歷陞四川巡撫清寬厚重撫御有方  
屬賴以安尋推兵部侍郎理南京戎政會有忌者拂

袖歸卒贈尚書予祭葬

人物志

萬建崑字季瑜南昌人虞愷之孫廷言之子萬歷進士  
除荊州府推官人以年少易之及視事習爰書精讞決  
雖老吏不如時江陵相籍貲產株連滋蔓建崑歎曰  
奈何以朽骨示威稜請一切弛之嘗核長沙郡牘有  
以贖鍰故淹罪人子孫者具狀請豁臺允之檄贖十  
金以下勿復追十五郡俱得視此以卓異徵故事未  
三十不與給事御史之選當軸者重建崑才謂增年

可得要地建崑持不可乃授禮部儀制司主事教習  
駙馬益勤職業嘗曰益而倖職以外靡而竊職以內  
兩無取焉時以為名言會廷臣請預建太子建崑亦  
侃侃具疏宵人作蜚語揭之通衢金吾上其事神宗  
震怒治言者建崑謫武岡尉歸而從其父講學注易  
所造益深家食二十餘年臺使銓部交薦皆留中不  
下光宗登極擢南京尚寶司卿不數月而歿侍御陸  
師贇及同里宦游者資其含斂乃以喪歸建崑三世

登顯仕而田宅不踰中人里中言清白吏者首稱焉

同上

劉定國初名是字去非南昌人浹之次子萬歷辛丑會  
魁改名定國初授全椒知縣以能調江都行取兵部  
主事歷尚寶少卿尋陞太僕寺少卿光祿寺正卿遷  
兵部侍郎以修理皇陵功陞南京工部尚書致政歸  
所著有奏疏學易劄記鴻雪館集行世同上

熊維寬字仲舒南昌人太僕卿瑞之仲子績學著書萬

歷中豫章飛雲社制藝矜式字內維寬主壇坫焉由  
博士入太學所著有寤堂集大雅堂集子曰馮崇禎

壬午鄉薦有卧雲堂集孫一瀟別有傳

同上

涂宗濬字鏡源南昌人萬歷進士由知縣擢山東道御  
史巡按廣西河南山西順天陞大理寺丞歷延綏巡  
撫加陞副都御史兵部右侍郎總督宣大山西尋陞  
右都御史兼兵部右侍郎晉兵部尚書加太子太保  
以順義王就封功廕錦衣千戶世襲乙卯乞休歸及

已老復起原官不得辭力疾輿襯以赴甫數日卒贈

少傳謚恭襄

同上

徐即登豐城人萬歷進士師事同邑都御史李材當材  
官滇南時奏緬掠中蘇御史之讒逮繫獄即登為禮  
部官暇即獄中受業淹郎署垂十年始遷福建提學  
副使閩舊為徽國教化之地即登崇聖學正文體與  
諸生窮性命指歸士風丕變由福建參政晉河南按  
察使辛丑考察調用既歸杜門謝賓客弟子益進著

儒宗要輯儒範正學堂彙來益堂彙易書詩春秋禮記說遜國諸臣錄詩文若干卷撫按薦章凡數十上

天啓六年卒年八十有二

府志

章潢字本清南昌人十三歲見鄉人負債縲絏者惻然為之代償與萬思默同舉業已而同問學有問先生近日談經不似前日之煩者潢曰昔讀書如以物磨鏡磨久而鏡得明今讀書如以鏡照物鏡明而物自見構洗堂於東湖聚徒講學聘主白鹿洞書院御史



吳安節疏薦少宰楊止菴奏授順天儒學訓導年八  
十二卒所著圖書編百二十七卷諭止修則近於李  
見羅論歸寂則近於聶雙江而其最諦當者無如辨  
氣質之非性離氣質又不可覓性則與戴山先生之

言若合符節矣

明儒  
學案

按人物志本清所著圖書編之外尚有書原始春  
秋竊義禮記劄言論語約言諸書

胡汝寧號似山南昌人萬歷進士授潮陽知縣擢禮科

給事中神宗末年國本有搖動之意汝寧引輕執義  
草疏以上事遂寢尋請告歸里南贛廵撫洪瞻祖乃  
其門下士也嘗登堂見其數椽不葺諷之出山汝寧  
仰視不答瞻祖歎息而出所著有掖垣奏議若干卷

安志

按饒仲以論太倉相下詔獄汝寧與陸夢龍等復  
交章劾仲以媚執政其生平可知矣人物志削而  
不載當以此姑從安志存之

原跋

萬煒字闇卿南昌人生而值父暮年家道日落至無以  
為養日課蒙計其所入充衣帛食肉之資勉勵發憤  
補弟子員父沒事母孝愈篤遇寢疾必同婦籲天願  
減已算延旦夕萬歷丙午歲貢授浮梁訓導矜式多  
士惟以躬行實踐為本却貧生入庠之贄甚貧者助  
以金遷吉水諭教思不倦如浮梁時鄒忠介倡道東  
南晉接必施隆禮歿廿餘年兩邑弟子員請祀名宦

人物  
志

劉一焜字元內萬歷進士授行人擢吏部主事歷考功郎中佐侍郎楊時喬典京察盡斥執政私入已改文選遷太常少卿以憂去久之擢右簽都御史巡撫浙江會遣中官曹奉建鎮海寺於普陀山一焜偕巡撫李邦華爭不可弗聽纖造中官劉成卒一焜慮遣代屢疏止之已得請矣有呂貴者奉命護成遺裝姦人因請留貴督織造疏直達禁中一焜與邦華極論其非帝卒命貴代之貴既任條行十事多所侵擾一焜

疏駁且禁治其爪牙貴為歛威一焜以暇築龕山海  
塘千二百丈濬復餘杭南湖民賴其利講陽明之學  
於虎林外郡小邑皆增學田御史沈珣誣訐其贓私  
一焜自引去卒贈工部右侍郎

白志

按一焜安志府志俱失載白志補入所著有石閭

山房集

劉一燝字著泉南昌人萬歷乙未進士是科劉氏同第  
者五人一為太府廷柱一為太僕洪謨而燝與駕部

一煜太傅一燬復為同堂昆弟海內稱科名盛事筮仕祁門令邑狹民不足於食仰他郡之轉輸一曠勸民出穀置社倉準朱紫陽法鄉各建倉凶荒得不告匱丁內艱服闋補上海縣苦逋賦追呼漠不肯應一曠親自挾格寬單民而先官戶民健訟隙起睚眦則網澤中遺骸為訟端廉得其實特嚴反坐之條七保為往來孔道遊民日繇浦中與風波爭命一曠疏其故道建閘以時蓄洩至今利賴之尋選授兵科給事

中疾終於京邸子斯陞字士雲制藝盛行海內是時  
臨汝有陳艾章羅稱四家豫章有劉余鄧三子劉即  
斯陞余名正垣鄧名履古

人物志

趙邦佐字勉吾新建人少穎異諸經子史目過即成誦  
長補郡庠益下惟攻苦遇試輒高等士林爭相引重  
力行善事敦倫勸學守謙好施識者謂邦佐厚種德  
必大顯子繼武亦能嗜古好學後邦佐以孫曰冕貴

贈通議大夫

同上

丁永祚字爾錫南昌人弱冠試儒童第一遂舉於鄉六  
上公車不利謁選授德化令德化僻小庠士多他邑  
人永祚為作南門以疏風氣邑始有科第調福清縣  
城險且庫薄屢議增拓而以費鉅莫敢任永祚力肩  
其役民不告擾且刻石頌功以治行異等除知太倉  
州補禹州擢刑部員外奉命讞江南獄豁免大辟謫  
戍數百擢知寶慶府晉秩按察副使仍理郡事未幾  
實補雲南糧鹽道抗疏乞休以參政致事

府志



熊劒化字神阿豐城人萬歷進士授增城令調繁華亭  
自奉簡約如寒素一切謙集餽遺悉謝却月俸外一  
介不苟取赴召辭境垂橐枵然兩蒼頭敝衣如故父  
老嘆曰世安知華亭宰廉介有是耶擢侍御史旋以  
假歸所著雲間集數卷燬於兵

人物志

李鼎字長卿新建人天資瑰異援毫風雨馳驟吐嗟數  
千萬言歲庚寅扯力克火落赤擁衆入據陝西莽刺  
川洮河大震鼎方在京師草安邊策六篇籌扯火二

酋事甚悉相國王錫爵許國見而奇之適鄭洛以大  
司馬經略西邊二相國具言鼎才俾贊畫幕府鼎於  
盛暑中間關七塞幾萬餘里所過自督撫大將軍而  
下莫不握手交懽鼎益極論諸關塞得失靡有避忌  
卒佐鄭司馬功成檄諭拉力克東歸而草火落赤市  
賞遂令遠徙者鼎之功也無何日本酋平秀吉將謀  
篡國逐朝鮮王李昖大司馬石星聞於上一時競議  
東征鼎又著海策六篇合前安邊策六篇草疏上之

下大司馬議覆當是時鼎以布衣獻書輦下君相咸  
虛懷採納名大噪於海內鼎治春秋如服虔氏治詩  
如鄭康成所著經詁二卷簡而確質而古博士弟子  
皆傳誦之

同上

彭坂字仲升南昌人為諸生時兄彭在賣藥燕市偶與  
羣閹一人病發死下在於獄坂急鬻衣裘器具充路  
費奔赴辨白留滯五年覓館穀供索餽值熱審在暴  
疾坂身代桎梏囚首庭階極辨得白歲月既久郡削

其弟子籍入成均萬歷庚子中順天鄉試以親老就  
漳平縣令調繁上杭縣有富人陳昌書者殺人應死  
或欲翫法而旁移其罪坂力爭不可諸所秉正執法  
多此類秩滿遷毘陵郡丞未半載解組歸家無擔石  
初刻有畸人集繼刻有匡山九子社集九子者樊良  
樞戴九元余槩張超張儲胡欽華余欽燿李良也子  
份萬歷戊午舉人官至副使任永平知府

府志

胡欽相字南渚南昌人萬歷甲午鄉舉居家篤踐履嚴

氣介性為時所敬憚未及仕而歿子鴻漸順治甲午

舉人

同上

喻致知字無知新建人萬歷進士授宜興令值歲大侵  
請賑上官不待報而發廩民賴以濟邑有兩沈盤互  
常鎮其民阻險易為盜賊致知略用鋸甬法間他陰  
伏以相參考往往得其主名衆遂解散而湖渡無警  
考選南京工科給事中上用人起廢疏極言壬午丙  
戌以來諸臣或以忤觸或以詿誤放擯如鄒元標趙

南星王德完輩皆所謂國之禎幹人之典刑何可不  
及時予環其他召對勤政之請諫止蘆田之封淑撤  
礦稅之使糾參馮尚寶之姦理學易名之議禁止私  
鑄之弊蠲祖賑饑之告安邊保泰之奏前後凡數十  
上以親老乞終養不得請抑鬱成疾卒

同上

朱多烜字貞吉弋陽王多煌之弟穎敏絕人善詩歌兼  
工繪事見古人墨蹟一再臨摹如出其手尺牘小札  
日可百函語皆有致嘗輕裝出遊變姓名為來相如

遠遊山水蹤跡徧吳楚之間嘗偕吳明卿入吳訪王伯穀於金陵王元美於弇山歸而掩關却掃以倦遊名其詩臨終操筆作帖命子謀墀以白幘鶴髦斂襟側並鐫勒銘識弟子私謚曰清敏先生

人物志

朱統鑑字佛大樂安靖莊王裔授封鎮國中尉究心古文詞賦著有適園詩集面壁齋文集鑑賦性至孝父奉國將軍謀璫博極羣書當神廟初宗齒日繁祿白匱用相國李廷機議貴令親支檢舉宗弊璫遂許奏

族宗謀墜以婢產冒濫奉旨削墜爵省祿可萬金嗣  
王銜之中墜以奇禍被逮鐵痛父冤叩閣上書奉旨  
復墜爵秩如初通國稱鐵為純孝子議泚議沌俱明

經議汴中癸未進士

同上

汪應婁字漢章新建人少負雋才萬厯己酉舉鄉公車  
不第益好為古文辭與相國張洪陽及里中耆宿為  
匡山社龍光社逃禪寄酒徜徉山水間以二親年高  
就浮梁教諭壬戌以母艱歸里結廬墓左未及服闋



病卒所著有隸事評及栖約齋玉毫庵黃山雲居天

都諸遊草

同上

樂繼同字于楚新建人萬厯丙子鄉舉初授湖廣通城縣教諭陞榮縣知縣值番酋倡亂郡邑望風解紐繼同慷慨請纓卒奏蕩平之効陞岳州府丞時久雨水漲膏壤淪沒繼同竭誠拜禱歲以有秋用薦擢本府

知府請告歸卒

府志

唐大章字伯和豐城人萬厯進士由庶常進編修歷南

祭酒會逆璫魏忠賢亂政有請建逆祠於國學傍者  
大章發憤抗言力持不可議遂寢竟以此忤璫意奪  
職崇禎戊辰起南禮侍尋轉吏侍擢禮部尚書教習  
庶吉士纂修神宗熹宗實錄旋充經筵講官改南禮  
部尚書卒於家享年八十遣官祭葬贈太子少保大  
章沒而俎豆於鄉賢輿論允愜皓首請老六子三十  
六孫繞膝一時所未有也文集若干卷藏於家

人物志

饒伸字抑之進賢人萬曆進士授工部主事十六年庶

子黃洪憲典順天試大學士王錫爵子衡為舉首申  
時行壻李鴻亦預選禮部主事于孔兼疑舉人屠大  
壯及鴻有私郎中高桂遂摘可疑者八人并及衡衡  
實有才名錫爵大憤疏辯與時行並乞罷帝留之命  
禮部覆試侍郎于慎行以大壯文獨劣擬乙置都御  
史吳時來不肯桂力爭乃如慎行議列甲乙以上時  
行錫爵調旨盡免黜且奪桂俸二月伸乃抗疏劾時  
來附權蔑紀請與錫爵洪憲俱賜罷錫爵時行杜門

求去帝皆慰留而下伸詔獄給事胡汝寧陸夢龍楊文煥御史林祖述管九臯毛在浚交章詆伸以媚執政由是伸廷杖削籍桂貶三秩調邊方伸既斥朝論多咎錫爵錫爵內不自安屢請敘用起伸南工部主事改南吏部引疾歸天啓初起南光祿少卿累官刑部侍郎魏璫亂政請告歸所輯學海六百餘卷時稱其浩博兄位字廷立累官工部侍郎母劉年百歲與伸先後以侍養歸先是任邱劉元震元霖兄弟俱官

九列以母年近百歲俱乞養親歸與仲兄弟相類一

時皆以為榮

白志

喻三元字少極豐城人萬厯中知平涼府沈義廉靜勇  
於仕事初至郡值敵犯靜固悉心防禦頒布保障條  
約遠邇戒嚴居民恃以無恐首禁宗藩請託諭令修  
禮義以重廉隅條議獎賢宗以勵不肖宗姓悉斂避  
不敢犯創行條鞭以蘇民困裁冗費冗役當事者或  
稱不便三元謂裁省非立異取怨以要譽當官如理

家視有無為豐嗇食人食者分人事上知封殖視民  
若路人如朝廷官人之意何一時臺省監司咸重之  
斷疑獄懲豪橫免贖鍰崇禮讓即漢循良無多讓者

陝西名  
宦志

饒景曜字廷獻進賢人萬厯進士筮仕刑部會鑛稅中  
使四出多以杭旨劾奏守令輒逮治景曜讞決多所  
匡持歷官河南少參浙東分巡所至有聲尋改督兩  
浙學政備兵金衢時值鑛賊竊發設方略禽渠領撫

按上其功晉河北參政旋陞浙江按察司轉四川石  
布政使未任而卒宦橐蕭然豫章論清操者以為最


人物志

羅朝國字維禎新建人萬厯癸未會魁授清浦知縣泖  
湖水衝蕩廬舍禾稼捐貲築堤勸農課士弭盜止訟  
以治最行取銓部歷尚寶卿通政使晉操江副都御  
史所建豎悉關安危至計其最著者如皖城立操廠  
練水師申明沿江防禦之法備載章章奏中特拔技勇

潘可大題授中權後勦流寇死難晉南京工部侍郎  
旋擢刑部尚書歸里門雍容論學講義一夕無疾而

逝贈少保予祭葬如例

縣志



江西通志卷六十九